



**Cunc dla dljia:** la ploania ringraziaia chi co á dé jö so contribut por la dljia y envieia chi co ne l'á nia ciamo fat da mostré solidarité y a dé so contribut por l'ann 2018: 30,00 € da pert de düc chi co davagna o ciafa na pensiun.

Cösc pó gní paié tla Cassa Raiffeisen: **IBAN IT 60 B 08010 58550 000305001820**, Cassa dal Sparagn: **IBAN IT 18 B 06045 58550 000005000568**. Iolan y Dio s'al paiil!



enformaziuns y termins

**Staziuns dla Schira Jonila y dai Ministronc:** en sabeda, ai 17 de merz sarál les Staziuns dla Schira Jonila y dai Ministronc da Badia a Oies. I s'encuntun ales 14:45 a Badia (dan calonia) por roé a Oies ala Santa Messa dales 16:00. Dedô pó düc sté n pü' adöm jö bas ete pa n picio renfresch. Düc é der bel enviés a tó pert.

**Oraziun da Taizé:** la proscima oraziun de Taizé ven tignida en vendres ai 16 de merz ales 20:00 tla capela a Oies. Al se trata de en n'ora olá ch'al ven perié, medité y cianté en forma de Taizé. Düc é der bel enviés a tó pert.

**KVV:** le KVV envieia ala 50ª encuntada dai vedui, vedoes y porsones sores en domegna, ai 18 de merz ales 09:30 a Porsenú tl'Academia Cusanus: messa con le vesco Ivo y sig. Josef Stricker; dedô referat dal vesco: "Co podunse pa dé ennant la fede te nostes families?" Le iade é debann, la marëna costa 17,00 €. Le bus passa a Longega ales 7.45. Prenotaziuns cina ai 14 de merz pa Maria de Ierghela ☎ 0474 501322.

**Posc de laur te Ciasa de Palsa:** la diretoria dla Ciasa de Palsa lascia alessei ch'al é gnü scrit fora **concursc** publics por curí chisc posc:

1 post (tomp parzial 29 ores al edema) de fisioterapista tla VII.ter cualifica funzionala, reservé al grup linguistich ladin. Al ven damané l'atestat de trilinguism B.

6 posc (3 tomp plen da 38, 2 posc a tomp parzial da 29 ores y 1 post a tomp parzial da 24 ores al edema) de operadessa sozio - assistenziala tla V. cualifica funzionala, reservé al grup linguistich ladin. Al ven damané l'atestat de trilinguism C.

4 posc (1 post a tomp da 38 y 2 posc a tomp parzial da 24 ores al edema) de operadessa sozio - sanitara tla IV. cualifica funzionala, reservé al grup linguistich ladin y 1 en post a tomp plen reservé al grup linguistich talian. Al ven damané le trilinguism D.

Les domandes de amisciun, da dé jö cina ales 12:00 dai 13 d'aorí, mess gní scrites fora sön le formular aposta da ciafé tai ofizi dla Ciasa de Palsa o da descarié dla plata internet [www.ciasadepalsa.it](http://www.ciasadepalsa.it). Por informaziuns, ☎ 0474 524 786.

**Uniun dles Eres Val Badia:** a ennom dles eres dal Surinam orunse ringrazié sign. degan, Iaco Willeit y sign. Franz Senfter, co á dit la messa a Oies, ai 2 de merz, y a dötes les eres, co é gnüdes al dé mondial de oraziun, a perié y a cianté Iolan dla gran offerta por les eres dl Surinam: al é jü ete la bela somma de 1.584,90 €

<b>Döt le bun a:</b>	Maria Rindler Daverda	* 12.03.1931
	Papa Francesco	lité 13.03.2013
	Jep Trebo	* 16.03.1933
	Maria Rigo Bergmeister, <i>Weitental</i>	* 17.03.1932
	y a düc chi co á santennom y complesc i agn cöst'edema	

**Impressum:** Ploania d'La Pli; redaziun Franz Rigo y Edith Willeit  
**Comunicaziuns cina le dedemesaledema** sera a Franz Rigo: ☎ 0474 500978 o ✉ [ploania@gmx.net](mailto:ploania@gmx.net)  
**Download plata:** [www.unitepastoral.org](http://www.unitepastoral.org)



**Idio ti á orü tan bun al monn, ch'al á dé ca so Fi su, por che vignönn co crei, áis te el la vita eterna.**

2 Cro. 36, 14–16.19–23 | Ef 2, 4–10 | Jan 3, 14–21

**Dal Vangelo do San Jan:**

Te chel tomp á Gejú dit a Nicodém: <sup>14</sup>Desche Mosé á inalzé la bisca tal desert ensciö mess le Fi dal Om gní inalzé, <sup>15</sup>por che vignönn co crei te el áis la vita eterna. <sup>16</sup>Dio ti á orü tan bun al monn, ch'al á dé ca so Fi su, por che vignönn co crei te el ne váis nia ademal, mo áis la vita eterna. <sup>17</sup>Idio n'á nia mené so Fi tal monn, por che el iudicheies le monn, mo por che le monn vegnes salvé tres el. <sup>18</sup>Chel co crei te el ne ven nia iudiché, chel co ne crei nia é belo iudiché, ciodich'al n'á nia cordü al ennom dal Fi su de Dio. <sup>19</sup>Deache con le iudize stara ensciö: La löm é gnüda tal monn, y la jont ti oreá plü bun ala scürité co ala löm; ciodiche söes opres ea ries. <sup>20</sup>Vignönn co fej dal mal ti á le senn ala löm, por che söes opres ne vegnes nia sö. <sup>21</sup>Mo chel co fej la verité röa tla löm, por ch'al vegnes manifesté, che söes opres é gnüdes fates te Dio.

**Oraziun dal de**

*Periun! Signur, nosc Dio, te to Fi aste reconzilié le monn con te a na maniera tan demorveia: dáí a to popul na fede sterscia, ch'al se proes con ligreza sön le tru dal ben adancuntra ala festa de Pasca.*

*Por nosc Signur Gejú Crist, to Fi, co é Dio y vir y regneia con te tl'unité dal Spirit Sant por düc i secui dai secui. – Amen.*

(Lezionar B)



Letöres dla Cuinta domegna de Carsema:  
**ler 31, 31–34 | Ebr 5, 7–9 | Jan 12, 20–33**

Edema liturgica dai 11.03. ai 18.03.2018

<b>DOM 11.</b>	<b>Cuarta domegna de Carsema "Laetare"</b> <i>Rosina, Ulrich</i> de dal Seminar y dai internac y dles scores dla dlijia
<b>08:30</b>	<b>gran messa</b> por dōta la ploania <i>oferta por le Kassian Tschiederer-Werk</i>
10:00	s.m. a Al Plan
<b>Lön 12.</b>	<i>Gregor, Beatrix</i>
→	<b>de d'oraziun personala y te familia</b>
<b>Ded 13.</b>	<i>Iudith, Paulina, Leander</i>
<b>07:30</b>	<b>s.m.</b> por † Verbene Pedevilla, Soröa <b>s.m.</b> por † Jep Rovara, Aroth/Plans
<b>Dem 14.</b>	<i>Metilde, Gottfried K.</i>
→ 19:30	<b>les Staziuns</b> con l'Uniun dai Ei
<b>Jöb 15.</b>	<i>Klemens Maria Hofbauer, Loise, Zacharias</i>
<b>19:30</b>	<b>s.m.</b> dai scolari dla mesana en onú de S. Maria dal Bun Consei <b>s.m.</b> por † Maria Willeit d'Ansele/Balsan
<b>Ven 16.</b>	<i>Heribert da Köln, Hilarius</i> <b>astinonza dla cern</b>
→ 19:30	<b>zelebrazion dla Parora de Dio</b>
<b>Sab 17.</b>	<i>Gertrud, Patrick</i>
18:00	s.m. prefestia a Al Plan
<b>19:30</b>	<b>s.m. prefestia</b> por † Genoveffa Ellemunter ved. Rigo, Matlogn <b>s.m.</b> por † Anastasia Terza, André
<b>DOM 18.</b>	<b>Cuinta domegna de Carsema</b> <i>Ziril da Ierúsalem, Eduard</i>
<b>08:30</b>	<b>gran messa</b> por dōta la ploania <i>oferta por i debojügnis dla ploania</i>
→ 19:30	<b>Via Crucis con grups y uniuns</b>
10:00	s.m. a Al Plan
<b>ampola:</b>	por fam. Pedevilla, Soröa
<b>ministronc:</b>	▶ da doman y domegna: Matteo Willeit y Armin Frontull ▶ da sera y domegna: Florian Rindler y Thomas Ellecosta
<b>i recordun:</b>	Genoveffa Ellemunter ved. Rigo + 16.03.2011



La bisca, fontana de vita! (Jan 3, 14–21)

**I ponsi do**

*Chel co gnea tal desert mort  
da na bisca da tosser podea  
ciaré sö dla bisca de brom che  
Mosé se portâ do, y al ne  
moria nia.*

*Ince Gejú é gnü inalzé söla  
crusc. Sc'i ciarun sö da el y  
cherdun che el é le Salvatur,  
podunse i dé n significat plen y  
etern a nosta vita.*

→ **I mo toli dant:** I ne mo lasciará nia scorajé dales dificoltés; i ô perié Gejú do la forza da les tó sö y les porté desche el á fat.

**I preii ensciö**

Dámo edli por t'odei, Signur, y creie en te che t'es le lominus zonza fin.

Dámo forza por ciaré sö da te y encunté töa vidlada co pordona.

Dámo speranza por ti ester, con töa presenza, ai momonc de sconfort y de rialöna.

Dámo en cör co sa da odeibun desco le to, ferí dala lanza, davert por gní fontana de speranza.

Dámo na fede sterscia en te, ch'i sunse bun da trasformé vigne falimont te na vitoria dla vita.



**Stories de Adam y Eva cuntades ai mituns (4)**



**L'urt „demorveia”**

Chelbeldio, le Signur á fat a ost – enló oláche le soredl lea – en urt. En urt plü bel co düc i atri urc dal monn: le urt de Éden, en paraisc demorveia.

Al á lascé cresce lens, lindes, palmes, zedri – söa ombria dea proteziun canche le soredl ea massa sterch. Lens, sön chi ch'al madoría pom, piers, limoni y pomaranc, daters y nusc, fighi y marili – bel da odei! Y ci bona saú!

Amez l'urt á Chelbeldio, le Singur lascé cresce dui lens particulars. Lens co ne garetá te degün urt dla porsona. Önn, al á ennom “len dla vita”, porta früc demorveia. Chel co i mangia ne messi nia möri. Al á vita por dagnora, desco Chelbeldio.

Ince le secundo len é unich de söa sort. Ala porsona co mangia de sü früc i vegnel daurí i edli: al reconesce ci co é bun y ci co é mal, ci co fej encontonta la porsona y ci co la fej malencontonta. Cösc len á ennom “len dla conescionza dal Bun y dal Mal”.

Chelbeldio, le Singur, á lascé nasce tal urt “demorveia” en rü co bagnâ l'urt y lasciâ cresce y garaté i ciöf. Al se despartesc te 4 rüs: önn a ennom “Pischon” y rogor tla tera de Hawila, olach'al é da ciagé or, media y peres prezioses. Le secundo á ennom “Gihon” y rogor tla tera de Kusch tal nordost dl'África. Le terzo é le „Tigris” y passa a ost dla tera de Assur. Le quarto é le “Euftrat”. *(va ennant)*



**Vesco Ivo Muser: letra de Carsema por la Joneza**

*Tla letra envieia le vesco Ivo os jogh danter l'ater da avei **Speranza & Coraje**. “I sonti ince le dejider ch'i eis te osc cör y osta orenté frema y sterscia co ves sbürta a orei n müdamont y a se dejidré n miú monn, plü iüst y davert al dagní, y cösc é ci co mo lascia speré. Emplí de cösta speranza ves cherdí: Ede coraje! Anfidésse! Seise os la tle dla müdaziun! No stede a ti dé lerch ala desperaziun te osc cör y no lascede che la rassegnaziun áis te os la soraventa! Ede l'ardimont da meterman y da dé le pröm vare!”*